

應天府志卷二

郡紀中

隋高祖文皇帝開皇九年正月乙丑朔陳註朝會群
臣大霧四塞晉王廣帥大軍屯六合鎮桃葉山戊
辰陳遣南豫州刺史樊猛帥舟師出白下辛未猛
與左衛將軍蔣元遜將青龍八十艘於白下遊奕
以禦六合兵賀若弼濟京口韓擒虎濟采石諸戍
望風走弼分兵斷曲阿之衝而入陳主乃命豫章
王叔英屯朝堂蕭摩訶屯樂遊苑樊毅屯耆闍寺

魯廣達屯白土岡東孔範屯寶田寺任忠屯朱雀
門晉王廣遣杜彥與擒虎帥步騎二萬屯新林辛
巳弼攻京口摩訶請逆戰陳主不許弼遂至鍾山
摩訶又請乘壘未堅出兵掩襲又不許任忠固請
守臺城緣淮立柵分兵斷江路陳主不能從壬午
弼引兵趣孔範範兵暫交即走諸軍大潰弼乘勝
至樂遊苑遂燒北掖門擒虎率眾至石子岡任忠
降引擒虎徑入朱雀航自南掖門而入獲其主叔
寶丙戌晉王廣入建康誅陳都督施文慶等於石

闕下王僧辯之子頒夜發陳高祖陵二月詔建康
城邑宮室并平蕩耕墾更於石頭置蔣州晉王廣
班師留王韶鎮石頭以郭衍爲蔣州刺史遂廢丹
陽郡省建康同夏秣陵三縣入江寧與溧陽俱屬
蔣州餘並廢

十年蔣山李陵自稱大都督詔楊素爲行軍總管討
平之

十一年析溧陽及丹陽故地置溧水縣屬蔣州

十二年復置永世縣屬宣州

十五年七月遣邳國公蘇威巡省江南

十八年併溧陽入溧水詔江南船長三丈以上括入官

煬皇帝大業元年廢方州更六合句容屬揚州尋立方山府于上沛領方山縣開邗溝自楊子達六合四年復以蔣州置丹陽郡領江寧當塗溧水三縣六年置丹陽郡城

八年密詔江南閱視民間歲貢童女姿質端麗者

九年八月朱燮管崇擁衆十萬餘自稱將軍掠江左

十二月劉元進攻丹陽將軍吐萬緒擊破之崇等皆敗死

十二年杜伏威起兵據六合衆數十萬遣光祿大夫陳稜擊破之方山府廢

十三年自淮及江東西數百里紀水無魚十一月起丹陽宮帝欲移居江東會亂不果

唐高祖神堯皇帝

李淵武德元年三月隋吳興太守沈法興舉兵攻

丹陽下之據江表十餘郡自柵江南道大總管承制置百官七月張童兒帥江界驍果數千人降李

密九月丹陽賊帥樂伯通帥眾萬餘降李子通子通以爲左僕射

二年置揚州東南道行臺尚書省蔣州廢

三年以江寧溧水二縣置揚州又析置丹陽溧陽安業三縣更江寧曰歸化以句容延陵二縣置茅州第江寧句容爲望溧陽溧水爲上六月命杜伏威爲使持節總管江淮以南諸軍事揚州刺史東南道行臺尚書令進封吳王六合時隸南兗州爲緊縣李子通渡江攻沈法興于京口法興敗走吳郡丹

陽等郡皆降于子通杜伏威遣行臺左僕射輔公祐將卒數千攻子通以將軍闕稜王雄誕副之公祐渡江克丹陽進屯溧水子通帥眾數萬拒之公祐簡精甲千人執長刀爲前鋒又使千人踵其後曰退者斬之自帥餘眾爲之殿子通爲方陳而前公祐前鋒千人殊死戰公祐復張左右翼以擊之子通敗走公祐逐之反爲所敗還堅壁不出雄誕以其私屬數百人夜出擊之伏威徙居丹陽

四年十一月杜伏威執李子通遂盡有淮南江東地

隋書卷之四十一
卷二
四
五年六月杜伏威入朝留輔公柘守丹陽王雄誕典兵為之副

六年八月淮南道行臺僕射輔公柘反殺王雄誕尋稱帝於丹陽國號宋脩陳故宮室而居之署置百官詔趙郡王孝恭大使李靖等討公柘

七年三月孝恭李靖屢破賊眾乘勝至丹陽公柘大懼棄城東走李世勣追至句容從兵能屬者纔五百人為人所執送丹陽伏誅江南平已亥以孝恭為東南道行臺右僕射頃廢揚州行臺為大都督復

置蔣州於金陵割六合西北置石梁縣復方州領之

八年復揚州又以延陵句容隸之茅州廢省安業人歸化更歸化曰金陵

按金陵志載復揚州于六年

上下殊戾據唐地理志正之

十二月以襄邑王神

符檢校揚州大都督始自丹陽徙州府及居民於

江北

按揚州治無常處至孫吳復遷建業唐以後

則在江都秦觀云自隋以後揚州皆在廣陵圖考

因之亦云隋末以江都為揚州自後揚州之名專

屬江都然唐書所載武德三年以江寧溧水置揚
州七年更名八年復揚州是隋雖移治而唐初復
置不得云專在江都自是年遷治之後揚始於建
業無與而景定志云貞觀七年復治江寧金陵志
遂云正觀七年復舊至德中復治江都不免附會
觀李敬業起兵揚州欲先取金陵則武后時揚州
已在廣陵矣豈得云正觀七年尚在建業而至德
中始徙江都哉况江寧更于九年而七年亦無江
寧其爲臆說無疑嗣是置江寧郡屬江東道而揚

州屬淮南所隸惟六合一縣凡事關揚州皆不書

九年徙金陵於白下村置白下縣并延陵句容隸潤
州以丹陽溧陽隸宣州

太宗文武皇帝貞觀元年廢方州省石梁以六合隸
揚州

七年省丹陽入當塗

八年七月江淮大水

九年更白下曰江寧

按圖考云貞觀七年更白下曰
歸化九年仍爲江寧縣志因之金陵志云七年更

白下曰江寧皆無據以唐書爲正

二十一年勅江南工人造大船

高宗皇帝總章元年江淮旱饑

二年四月徙高麗戶於江淮

中宗皇帝嗣聖元年九月英公李敬業起兵揚州薛仲璋說敬業曰金陵負江其地足以爲固且王氣尚在宜先爲霸基後鼓行而北敬業遂取潤州太后遣李孝逸往擊之又使黑齒常之將江南兵爲孝逸援旣而孝逸軍退守石梁監軍魏貞宰固請進戰遂敗敬業殺之

九年五月禁屠殺採捕時江淮旱饑民不得捕魚蝦
餓死甚衆

十八年地震

景龍元年十二月遣使詣江淮贖生

玄宗明皇帝開元十四年秋大風自東北來海濤沒
瓜步

天寶元年以六合縣屬廣陵割縣東北境置千秋
十五載十月永王璘反時上皇入蜀命璘領四道節

度使璘子瑒有勇力好兵勸璘以天下大亂惟南方完富宜據金陵保有江表如東晉故事上聞之敕璘歸覲不從遣淮南節度使高適等討之璘擅引舟師東巡沿江而下明年江南採訪使李成式討璘璘敗走死

肅宗皇帝至德二載正月以江寧縣置江寧郡并領句容溧水溧陽

乾元元年改江寧郡爲昇州統縣如故以刺史韋黃裳爲浙江西道節度使兼江寧軍使治昇州

二年以顏真卿爲浙西道節度使尋召還以侯令儀代之後徙浙西治蘇州

上元元年十一月江淮都統劉展反襲下蜀陷潤州昇州軍士萬五千人謀應展攻金陵不克而遁侯令儀懼以後事授兵馬使姜昌群棄城走昌群即詣展降昇州陷展僞授昌群爲刺史勅兵馬使田神功討之

二年正月田神功遣范知新將四千人自白沙濟趣下蜀展拒擊不勝將軍賈隱林斬之更江寧縣曰

上元昇州廢仍以句容上元屬潤州而溧陽溧水屬宣州

按唐書昇州廢於是年金陵志沿革盡從之而表中復云寶應元年廢昇州者何也此類甚

衆不能悉辯

江淮大饑

寶應元年江東大疫人民死者過半

代宗皇帝大曆三年平盧行軍司馬許杲將卒三千人窺淮南詔和州刺史行營防禦使張萬福討之萬福至州杲懼移軍上元又渡江而北萬福追斬之

德宗皇帝建中四年浙江東西節度使韓滉聞朱泚作亂築石頭城穿井近百所繕館第數十修塢壁起建業抵京峴樓堞相屬以備帝渡江時鹽鉄使包佶濟江有守財卒三千爲淮南節度使陳少遊所奪佶與數十人至上元

興元元年議者言韓滉聚兵修城陰蓄異志上疑之以問李泌對曰滉鎮撫江東所以修城爲迎扈之備耳他日又言於帝帝即下泌章令其子臯歸省臯至滉感悅發米百萬斛自送至江上冒風濤而

遣之遂加滉同平章事江淮轉運使

貞元二年魚鱉蔽江而下皆無首六月江溢

八年七月江淮大水害稼溺死人漂沒城郭廬舍八

月遣官宣撫

憲宗皇帝元和二年十月鎮海節度使李錡反遣牙

將庾伯良將兵三千治石頭城尋爲兵馬使張子

良所執伏誅

三年江南旱

穆宗皇帝長慶二年江淮饑

三年三月江南旱遣使宣撫以李德裕爲浙西觀察

使

四年二月詔江甯常貢外無得進奉

文宗皇帝太和四年江南大水害稼

八年夏江淮大旱

開成四年夏江溢大水害稼

武宗皇帝會昌元年七月江南大水

懿宗皇帝咸通元年正月浙東賊裘甫作亂觀察使

鄭祗德遣兵討之大敗浙西遣兵赴之宣潤將士

請土軍爲導不果劉暉說甫宜遣兵過大江掠揚州還修石頭城而守之宣歙江西必有響應者甫猶豫未決詔王式發諸道兵討甫擒誅之

二年江淮旱

七年江淮大水

九年江淮旱蝗十二月龐勛敗官軍乃分遣其將丁從實等各將數千人破烏江遂寇滁和州

僖宗皇帝廣明元年七月黃巢渡江圍六合燒龍津橋淮南將畢師鐸請高駢擊之駢不出兵上表告急下詔責駢

中和四年江南大旱饑人相食秦宗權遣其將秦賢侵江南所至屠翦焚蕩無遺

光啓元年正月江水赤凡數日

三年四月六合鎮遏使徐約爲周寶所誘遣兵擊蘇州逐其刺史張雄雄遣將趙暉入據上元五月秦彥將宣歙兵三萬餘沿江而下暉邀擊於上元殺溺太半會周寶敗浙西潰卒多歸暉衆至數萬遂治南朝臺城居之服用奢僭閏十一月雄泝江而

上暉以兵塞其中流雄怒攻上元拔之暉奔當塗未至爲其下所殺餘衆降雄悉阮之

文德元年八月楊行密欲襲洪州袁襲曰鍾傳未易

圖也趙錕新得宣州衆心不附公宜卑辭厚幣說

上元張雄使自采石濟江侵其境彼必來逆戰公

自銅官濟江會之破錕必矣行密從之雄果爲錕

所敗

昭宗皇帝大順元年復置昇州於上元縣以張雄爲

刺史領縣如故

按新唐書地理志光啓三年以上

元等四縣置昇州張雄傳大順初以上元爲昇州

授雄刺史吳錄馮弘鐸傳大順元年復以上元爲

昇州命弘鐸爲刺史是時雄尚存綱目通鑑俱從

雄傳且志稱上元廢光啓復者指昇州也上元縣

志誤將紀元作縣名遂以州之興廢爲縣之興廢

云

二年正月孫儒盡舉淮蔡之兵濟江楊行密城戍皆

望風奔潰儒前軍至溧水行密使都指揮使李神

福拒之神福陽退以示怯儒軍不設備神福夜帥

精兵襲之俘斬千人

景福二年七月張雄卒其將馮弘鐸自稱刺史九月弘鐸叛附于楊行密

天復二年五月馮弘鐸以昇州介宣揚之間自恃富疆帥衆襲宣州敗走楊行密取昇州以其將李神福爲刺史

三年九月田頽以楊行密遣李神福攻鄂乘虛襲昇州得神福妻子善遇之神福東下頽遣使謂之曰公見機與公分地而王不然妻子無遺神福曰吾以卒伍事吳王今爲上將義不以妻子易其志斬使者而進請行密發兵頽竟敗死

昭宣帝天祐三年五月楊渥以昇州刺史秦裴爲西南行營都招討使將兵擊鍾匡時

淮南稱唐天祐六年

三月徐溫以金陵形勝戰艦所聚乃自以

淮南行軍副使領昇州刺史留廣陵以其假子元從指揮使知誥爲昇州防遏兼樓船副使往治之

吳稱唐天祐九年

三月徐溫遣都指揮使柴再用帥昇兵納

制置使王檀于宣州昇州副使徐知誥爲之副代

李遇遇不受代五月温殺之知誥以功遷昇州刺史
史辟宋齊丘為推官

吳稱唐天祐十二年八月以昇州為都指揮使齊國公徐温巡屬

吳稱唐天祐十四年四月徐知誥治昇州城市府舍甚盛五月

徐温行部至愛其繁富潤州司馬陳彦謙勸温徙鎮海軍治所於昇州温從之以彦謙為節度判官

尋治舟師於金陵

吳宣王楊隆演武義二年五月吳王溥立改昇州大都督府為

金陵府拜徐温金陵尹

吳廢皇楊溥乾貞元年十月徐温卒以其子知詢代鎮金陵

三年八月徐知詢留武昌節度使李簡親兵二千于金陵十一月知詢朝廣陵知誥留之以知諤為金陵尹

吳太和三年十一月徐知誥表請歸金陵以知誥為鎮海

寧國節度使金陵尹總錄朝政

四年二月徐知誥作禮賢院於府舍八月廣金陵城周二十里

五 五月宋齊丘勸徐知誥徙吳主都金陵知誥乃營宮城於金陵

六 正月徐知誥別治私第於金陵移居之虛府舍以待吳主二月吳主遣宋齊丘諭知誥罷遷都知誥還府舍甲申金陵大火乙酉又大火知誥疑有變勒兵自衛十一月知誥召其子景通還金陵為鎮海寧國節度副大使判中外諸軍事

吳天祚元年 十月以昇州為齊王徐知誥封邑

二 正月徐知誥始建大元帥府十一月命知誥置百官以金陵府為西都

三 正月徐知誥建齊國于金陵改金陵為江寧府牙城曰宮城廳堂曰殿始建太廟社稷置騎兵八軍步兵九軍尋更名誥十月誥稱帝國號唐奉吳主溥為讓皇遂以六合屬江寧餘縣如故

南唐烈祖徐誥昇元三年 正月唐主復姓李氏更名昇立宗廟

祀南郊十月如江都欲遂居之以漕運不給十二月還金陵

六 十一月溧水縣天興寺桑樹生木人

七年二月唐主昇殂三月子璟立七月以金陵尹燕王

景遂為諸道兵馬元帥徙封齊王居東宮

南唐元宗璟保大三年復割上元南境置江寧縣

六年改六合為雄州

九年十月遷馬希崇之族及將佐千餘人于金陵

十一年七月大旱井泉涸民饑疫死者過半復置六合

縣

十二年江寧災焚廬舍營署踰月乃止

十四年四月將軍陸孟俊進攻揚州周韓令坤棄走周

遣張永德將兵救之令坤乃還又遣趙匡胤將兵

屯六合匡胤令曰揚州兵有過六合者折其足令

坤始有固守之志齊王景達將兵二萬自瓜步濟

江距六合二十餘里設柵不進諸將欲擊之匡胤

曰彼設柵自固懼我也今吾眾不滿二千若往擊

則彼見吾眾寡不如俟其來而擊之破之必矣居

數日景達兵趣六合匡胤奮擊大破之殺獲近五

千人餘眾尚萬餘爭舟走渡江多溺死者是戰也

將士有不致力匡胤陽為督戰以劔斫其皮笠明

日徧閱皮笠有劒跡者數十人皆斬之由是部兵莫敢不盡死既下六合先鋒石守信遂入渦口克

揚州

十五年十二月周趙匡胤破揚州兵于瓜步

南唐中興元年周取雄州尋廢之以六合屬揚州五月唐

奉周正朔更名景

周世宗皇帝柴榮顯德六年六月唐主修治金陵城郭

宋太祖神德皇帝趙匡胤建隆二年二月唐主景徙都洪州尋殂子

煜立於金陵

宋開寶四年唐貶國號曰江南

七年九月遣曹彬將兵發江南十一月潘美造浮梁於

采石帥步兵渡江江南主遣鄭彥華督水軍杜貞

領步軍逆戰十二月彬等敗其軍於白鷺洲又敗

其軍於新林港江南始下令戒嚴

八年正月曹彬遣別將田欽祚敗江南軍於溧水斬

其都統使李雄彬自拔昇州城南水砦二月彬又

敗其軍於白鷺洲拔昇州關城知揚州侯陟敗其

軍於宣化鎮三月彬敗之於江中四月又敗之於

秦淮北時江南兵水陸十餘萬背城而陣潘美率所部先赴兵大潰進圍金陵十月江南都虞候朱令贇自湖口帥衆入援順流而下將焚采石浮梁彬聞之遣都部署王明密令人樹長木於洲渚間若帆檣狀令贇望見疑有伏逗撓不敢進明因移檄諸將掎角之令贇勢促因縱火拒戰會北風甚火反及之大潰擒令贇金陵愈危十一月彬夜敗其軍於城下遂克金陵江南主煜降門下侍郎陳喬死之是年復昇州領縣五上元江寧句容溧陽

溧水而六合仍隸揚州

九年置上元都監察五月遣司勳員外郎和峴往江南路採訪

太宗皇帝太平興國二年正月置榷茶場於江南嚴鹽銅禁

八年七月江水溢禁江南私蓄弓劍甲鎧

雍熙元年除江南鹽禁

二年三月江南民饑許渡江自占四月遣使賑之三年九月蠲昇州二年官所賑貸

端拱元年割溧陽胎德等三鄉益建平縣

淳化元年二月除江南漁禁

三年十月命雷有終制江淮茶鹽

四年二月江南饑遣使巡撫

五年江南疫置上元縣淳化鎮

至道二年以六合縣屬建安軍割縣東境益永貞

三年昇州旱除今年秋稅

真宗皇帝咸平三年江南旱賑之

景德元年閏九月江南旱遣使決獄訪民疾苦祠境

內山川

二年改陶吳鋪為金陵鎮

大中祥符元年春昇州黃雀群飛蔽日有從空墜者

二年四月昇州大旱火遣御史訪民疾苦蠲被火屋

稅

三年八月詔江南轉運使決獄遣使昇州存撫祠境

內山川以連歲亢旱火災故也詔昇州長吏兼安

撫使

四年五月詔葺江寧太平興國寺及寶誌塔殿六月

遣使安撫江淮南水災許便宜從事

五年五月江淮南旱給占城稻種教民種之

七年八月除江淮南被災民租

天禧元年置常寧鎮于句容改長干寺爲天禧六月
除昇州後湖租錢五十餘萬聽民溉田江淮南蝗
並言自死八月詔蔣山太平興國寺歲度僧二人
給米百石

二年以昇州爲江寧府范仲淹開長蘆西河以避江
險

四年江淮稔改句容爲常寧後復舊

仁宗皇帝天聖元年六月罷溧水採丹砂十一月禁

江南巫邪

四年六月江淮南大水肆赦蠲租撫流民

六年七月江寧府六合江水溢壞官民廬舍遣使安
撫賑卹

明道元年三月江東淮南旱饑遣使與長吏錄繫囚
江寧府觀察判官元絳賑濟有方詔以秘書省著
作佐郎

二年春詔發運使以上供米賑江東淮南饑民遣使督視饑死者官爲之葬范仲淹請遣使循恤遂命之安撫所至開倉賑貸條陳救弊十事其八則以太后重建長蘆寺于六合後兵糧四萬斛棟宇塑像之資又三十萬緡施之於民可以寬重歛施之于士可以增厚祿施之于兵可以拓舊疆自今願常以土木之勞爲戒

景祐二年十月詔江東歲輸緡錢易以帛

慶曆七年四月詔江東轉運司官楊紘等苛刻並削職

八年正月江寧府火宮室焚燬殆盡惟南唐王燭殿僅存

皇祐三年八月江南淮南饑遣使安撫

四年三月蠲江南路民所貸種數十萬斛

五年江寧府蝗十月令監司諭親民官上民間利害

嘉祐元年五月江溢

四年詔進昇爲大國母得封以帝始封昇王故也尋徙江南東路兵馬鈐轄于江寧府

神宗皇帝熙寧元年江寧府飛蝗自江北來
二年下青苗法于江南置常平倉

三年十月詔江寧府織羅務罷差內侍監當

四年罷江南差役輸免役錢

六年溧陽大旱十月賑江淮饑

七年賜江寧府常平米五萬碩修水利

八年正月輟江南東路上供米均給災傷州軍八月

詔發運司體實淮南江東米價州縣所存上供米

減直予民

元豐四年七月大風潮漂蕩沿江廬舍損田稼

七年王安石請以所居上元園屋爲僧寺賜額報寧

哲宗皇帝元祐元年閏二月復常平舊法青苗諸法

俱罷

六年修上元蔣子文祠賜額忠烈

徽宗皇帝建中靖國元年江淮旱

崇寧元年十二月詔江南開遇明河自宣化江口至

泗州淮河口

三年六月以江寧府進士侍其瑀經行詔乘驛赴闕

五年正月復置江淮常平都倉遇明河工畢

大觀元年第六合為望縣詔江寧府控山踰海大水阻隔山川鞏固嶮不可近以府為帥府賜溧陽史崇祠額顯惠修茅山元符觀祠

三年江淮大旱守臣曾孝序上言欲將常平司見在諸色錢諸司封椿錢趁時收糴稻種候將來春種出糴與力田之人詔速行之減江寧府歲貢生白瓜子羅二百匹

政和三年江東旱

五年六月江寧府水災

重和元年江淮水詔監司督貴州縣還集流民

宣和二年詔減江寧府添差兵官人數

三年正月以方臘反詔金陵守備時玉稟守楊子口劉鎮守金陵賊陷旌德劉延慶退守金陵鎮移廣德軍四月賊平五月詔江寧守臣兼安撫使并修府城壁留戍兵曲赦江東路詔發運使陳亨伯內侍譚稹條具運河措置以聞初稹為制置使欲開一河自盱眙出宣化朝廷下發運司相度陳亨伯

遣其屬向子諲視之子諲言運河高江淮數丈遂不果

五年四月置提舉鹽事司于江寧府

六年發運使盧宗原開靖安河八十里通於江以避黃天蕩之險六合上元分治之

七年九月知府事盧襄請罷丹陽石臼固城三湖爲圩田

欽宗皇帝靖康二年三月帥府僚屬謀奉康王構渡江左不果五月王即位改元宰相李綱以建康爲東南都會宜命守臣修葺城池衛尉少卿衛膚敏言建康外連江淮內控湖海爲東南要會中書舍人劉珣亦言金陵天險前據大江可以固守於是宰相而下皆主幸東南之議時江寧府禁卒周德叛執知府宇文粹中殺官吏會經制司屬官鮑貽遜統勤王兵七千至城下德等乃受招安李綱尋次江寧與漕臣李彌遠謀誅首惡五十人其餘部赴行在溧陽縣卒起應德知縣楊邦乂捕滅之事聞遷本府通判詔江寧府儲資糧修城壘以備巡

幸六月置帥府于江寧以知府翁彥國兼江東安撫使馬步軍都總管充經制使十月以劉光世爲江寧府界招捉盜賊制置使命討叛兵

高宗皇帝建炎二年六月詔踈決江寧府繫囚十月霖雨十一月置江東路提刑司于江寧

三年二月金人入寇遂渡楊子橋游騎至瓜洲乃命劉光世充行在五軍制置使控扼江口楊惟忠節制江東軍馬駐江寧金人陷六合統制王亦謀據江寧不克遁置江寧權貨務都茶場三月以呂頤

浩爲江南東路安撫制置使會苗傅劉正彥作亂詔至江寧頤浩帥勤王兵萬人討賊五月帝如江寧府駐蹕神霄宮改府名建康第上元江寧爲次赤句容溧陽溧水爲次畿六月太后至建康大霖雨詔郎官以上言闕政以建康府安撫使連南夫兼建康等府州制置使帝移御行宮七月太子專卒殯於建康鉄塔寺八月太后發建康閏月命杜充兼江淮宣撫使守建康帝發建康如浙西十一月金人犯建康陷溧水縣尉潘振死之岳飛入六

合敗李成成合見兀术攻烏江充閉門不出飛泣諫
請視師充不從虜尋犯溧陽飛遣人夜半馳至縣
殺獲五百餘人擒女真漢兒并僞同知溧陽事渤
海大師李撒八等一十二人及千戶留哥虜入建
康守臣陳邦光戶部尚書李稅迎降充渡江居長
蘆寺遂率麾下叛降通判楊邦乂死之江南大旱
四年四月金兀术至江上韓世忠先以八千人屯焦
山寺邀其歸路接戰凡數十合敵終不得濟俘獲
甚衆擒兀术之婿龍虎大王兀术懼盡歸所掠以
假道世忠不許兀术循南岸世忠循北岸且戰且
行將至黃天蕩兀术窘甚或曰老鸛河故道今雖
湮塞若鑿之可通秦淮一夕渠成五十里遂趨建
康岳飛以騎三百步兵三千邀擊于新城大破之
兀术乃復自龍灣出江中欲謀北渡世忠與之相
持于黃天蕩豫以鉄纜貫大鈎授健者明旦敵舟
譟而前世忠分海舟爲兩道出其背每縋一纜則
曳一舟沉之兀术窮蹙求會語祈請甚哀世忠曰
還我兩宮復我疆土則可以相全兀术語塞又數

日求再會而言不遜世忠引弓欲射之兀术亟馳去見海舟乘風使蓬往來如飛謂其下曰南人使船如使馬柰何乃募人獻破海舟之策閩人王姓者教其舟中載土以平板鋪之穴船板以權槩俟風息則出且以火箭射其篷蓬則海舟自破矣兀术用其策世忠遂潰兀术乃渡江屯六合輜重自瓜步至六合輜艦相銜不絕五月金人在建康大肆焚掠自靜安鎮渡宣化而去岳飛邀擊金人于靜安大敗之七月兀术聞張浚將舉兵北伐始自六合引兵趣陝西八月滁濠鎮撫使劉綱以乏食率兵奔溧陽十月江東賊張琪犯建康府劉洪道招降之

紹興元年正月置江東路安撫司治池州以呂頤浩爲安撫大使九月詔復治建康十一月安撫大使葉夢得以詔招王才降之榜諭江東群盜赦其脅從者

二年三月罷江淮發運司五月詔修建康行宮六月以劉光世爲寧武軍節度使韓世忠爲太尉移屯

建康八月詔孟庾韓世忠總大兵至建康進赴行
在罷修行宮十一月令庾世忠措置建康兵馬爲
屯田計十二月以光世爲江東西宣撫使置司建
康明年移司池州

四年二月作建康行宮七月詔江東安撫司招水軍
千五百人十月命劉光世移軍建康以孟庾爲行
宮留守張浚尋率兵如建康十一月金人犯六合
復犯滁口十二月兀朮屯竹塹鎮爲韓世忠所扼
以書幣約戰世忠遣麾下王愈及兩伶人以橘茗
報之且言張樞密已在鎮江兀朮遂有歸意張浚
遣張宗顏潛至六合出其背襲之不克浚遂屯建
康

五年正月以張浚爲江東宣撫使駐建康

六年六月張浚請移都建康以圖中原因命張浚練
兵爲進討計十月置營田司于建康十二月命都
督府叅議軍事呂祉如建康措置移蹕以建康田
十頃賜死節安化郡王王稟家

七年正月置建康御前軍器局築宣化渡城三月帝

移蹕建康減流罪以下囚蠲逋賦及下戶今年身
丁錢賜劉光世第于建康四月命守臣增修揚邦
又廟築太廟于建康修濬建康城池七月以六合
旱蠲逋租以建康疫甚遣醫行視貧民給錢葬其
死者命踈決滯獄詔即建康權正社稷之位十月
蠲江東月椿錢十二月中書門下省檢校正官張
宗元寓建康槃冰有文如画佳卉茂木華葉相敷
日易以水變態竒出至春暄乃止

八年二月減建康夏稅折輸錢蠲民戶逋租和市科

調以呂頤浩兼行宮留守帝發建康如臨安定都
八月蠲江東月椿錢

九年知府事葉夢得重修府學闢門南向以面秦淮
又作小學于大門之東奏增教官一員

十年三月復營建康行宮六月罷

十一年五月置淮西江東軍馬錢糧所于建康九月
建康大火延燒府治自外門至堂宅皆燬惟軍資
庫及大軍庫無損是年大旱

十五年七月免建康見負官錢十月復免所增上供

米

十六年三月立江東州縣歲較營田賞罰格

十七年建康火九月蠲江東月椿錢

十八年夏江東淮南旱

二十三年八月以建康永豐圩田賜秦檜

二十六年八月蠲建康積欠內帑錢帛

二十七年詔川馬隸建康七百五十匹

二十八年正月遣官檢視江東淮南沙田蘆場尋增

租課

三十年六月賜城北黑龍神廟額曰孚澤茅山龍神
祠額曰廣濟

三十一年九月金主亮大舉入寇以制置使劉錡兼

招討使十月錡將王權潰于昭關帝親征詔葉義

問督視江淮軍馬虞允文叅謀軍事錡命小校何

兼資領五十人至六合候望遇神將將兵相助遂

敗虜于皂角林亮以軍趨六合欲斷錡軍後十一

月朔步軍司統制邵宏淵遣統領崔阜及金人戰

于定山敗之義問至建康詔令李顯忠代權金人

犯瓜洲中軍統制劉汜戰敗走權都統制李橫亦
遁虜鐵騎奄至江上義問惶怖退保建康虜游騎
至無爲軍期以翌日南渡允文督建康諸軍統制
官張振王琪時俊戴臯等以舟師拒亮于采石大
敗之亮遂趨揚州亮屯重兵滁河造三牖儲水深
數尺允文命張深守滁河口扼大江之衝以苗定
駐下蜀爲援

三十二年正月帝至建康二月發建康復如臨安詔
建康立統領姚興廟賜額旌忠十月除上元縣金
陵鍾山慈仁三鄉攤江田租十二月罷建康營田
官兵修築建康府城

孝宗皇帝隆興元年正月以張浚爲樞密使都督江
淮軍馬開府建康六月詔楊存中先詣建康措置
營砦檢視沿江守備立統領王琪廟於建康賜額
忠節貶張浚爲江淮宣撫使浚以郭振守六合振
屯兵築城八月復以浚都督江淮浚尋至六合勞
策應軍馬江東大水悉蠲其租

二年三月詔三衙戍兵歸司建康以王彥爲建康諸

軍都統制四月以建康歸正人爲忠毅軍詔石頭城置柵以處之七月建康大水浸城郭壞廬舍操舟行市者累日人溺死其衆詔賑之并各官陳闕失八月命江東守臣措置開決圩田十一月金人犯六合步軍司統制崔臯擊却之郭振統五軍并殿司軍馬屯六合隸步軍司

乾道元年修築建康府城時青溪湮塞建康多水患命汪澈指定以聞澈欲依異時河道通柵門入江從之八月以永豐圩田賜建康都統司

二年正月省六合戍兵以所墾田給還復業之民二月賑江東饑五月修建康行宮尋罷六月廢永豐圩八月降會子交子于建康務場令江淮人對換十二月六合武鋒軍壘火

三年六月罷江東總領所營田募人耕佃壯丁各還本屯癯老存留減半請給八月以史正志兼沿江水軍制置使江南北及沿海十五州軍悉隸之十二月增修六合城江東蝗賑之安撫胡昉奏興瓦梁堰入和州以不便六合遂已

四年七月建康水移放生池于青溪十二月減江東
明年夏稅和市之半

五年知府事史正志重修鎮淮飲虹二橋上爲大屋
數十楹

六年五月建康水城市有深丈餘者人多流徙詔被
水縣分人戶今年身丁錢並與放免

七年三月徙侍衛馬軍司戍建康江東旱賑之

八年七月詔免建康府絹二千五百匹

九年正月遣官鬻江東營田及沒官田是年旱

淳熙二年建康大旱饑知府事劉珙賑濟之六合蝗
詔賑以常平米

三年劉珙立程明道祠十月詔開六合新河

四年建康雨雹民饑

五年閏六月置建康轉般倉雨雹者再

八年建康饑知府事范成大請賑從之

九年盜發柴溝及徐五稱大將軍范成大皆擒誅之
七月六合蝗

十年建康旱

十一年建康雨水七月禁諸州遏糴詔賑卹之始立

養濟院

十五年五月六合大水

光宗皇帝紹熙元年知府事章森立廂禁軍新營

二年正月修六合城

三年江東水

四年八月賑江東旱傷貧民

五年建康大水賑之仍蠲其賦

寧宗皇帝慶元元年正月詔淮南江東荒歉收養遺

棄小兒修府城北門親兵寨置廣惠倉

四年正月詔有司寬恤江淮流民建康饑軍乏食

六年建康旱賑之

嘉泰元年江東淮南旱賑之仍蠲其賦

四年十一月修六合城

開禧二年十一月金僕散揆分兵入寇進圍和州我

師萬五千駐六合揆偵知之即以右翼掩擊斬首

八千級進屯瓦梁河以控真揚之衝十二月知府

事葉適命石跋定山之人劫敵營得其俘馘以歸

金解和州圍退屯瓜步先是虜破安豐副都統制
畢再遇謂諸將曰六合最要害彼必併力攻之乃
引兵赴六合尋命節制淮東軍馬虜行至竹鎮距
六合二十五里再遇登城偃旗鼓伏兵南土門列
弩城上敵方臨濠衆弩俱發我師出戰聞鼓聲城
上旗幟並舉虜驚遁追擊大敗之金萬戶完顏蒲
束都千戶泥龐古等以十萬騎駐成家橋馬鞍山
進兵圍城數重欲燒垣木決濠水再遇令勁弩射
退之既而紇石烈都統合兵進攻益急城中矢盡
再遇令人張青蓋往來城上金人意其主兵官也
爭射之須臾矢集樓墻如蝟獲矢二十餘萬紇石
烈引兵退已乃益增兵環城四面營帳亘三十里
再遇令臨門作樂以示閑暇而間出奇兵擊之虜
晝夜不得休乃引退再遇料其且復來自提兵奪
城東野新橋出敵之背虜遂走滁州適又遣石斌
賢渡宣化夏侯成等分道而往所向皆捷金棄滁
遁去郭倪遣前軍統制郭僕救六合遇于胥浦橋
敗績倪棄揚州走詔進再遇鎮江都統權山東京

東路招撫司

三年正月詔建康給淮民裝錢遣歸業葉適度沿江地創三大堡石跋則屏蔽米石定山則屏蔽靖安瓜步則屏蔽東陽下蜀西護溧陽東連儀真緩急應援首尾聯絡東西三百里南北三四十里因言堡塢之成有四利大要謂敵在北岸共長江之險而我有堡塢以爲聲援則敵不敢窺江而士氣自倍戰艦亦可以策勲六合等城或有退遁我以堡塢全力助其襲逐或邀其前或尾其後制勝必矣

三堡成流民漸歸

嘉定元年八月發米賑糶江淮流民

二年建康蝗旱大饑斗米數千錢人食草木詔收養遺棄小兒

三年盜劫城東南知府事黃度立擒之發帑廩以賑饑民所活百餘萬口蠲夏稅二十餘萬境內始安四年增置養濟院二所養貧民以五百人爲額

五年建台城樓忠孝堂于卞壺墓側復作晉元帝廟并祀其臣王導而下三十六人

七年九月詔步軍司准效人數跋克六合守禦兵效
十一月步軍司請差二千人兼三百騎應六合從
之江東提舉李道傳撤瓜步山魏主燾像以其地
祀山之神

八年四月六合蝗六月詔江淮諭民雜種粟麥麻豆
有司毋收其賦田主毋責其租七月建康旱甚發
米賑之運使真德秀又合本道義倉及轉般米數
十萬斛賑贍仍開東門外新河因役力以食饑民
九年三月詔六合守禦兵效作忠勇左軍尋改爲將

九月詔江東監司覈州縣被水最甚者蠲其租真
德秀創漕司貢院于青溪之西

十年知府事李珣浚珍珠河

十二年三月金人分兵自盱眙犯六合流民渡江避
亂城悉閉金游騎至楊林渡會援兵入乃解去

十四年建康大水

十五年知府事余嶸請于朝建平止倉于廣濟倉左
秋冬糴米貯之春夏乃糶取價平則止之義

十六年九月詔江淮諸司賑恤被水貧民

應天府志卷之二
十七年密劄下建康增兵防守

理宗皇帝寶慶三年秋溧水澇

紹定二年增收後湖田租遂爲額

四年十二月置江淮安撫制置大使治建康

端平三年冬蒙古寇六合總轄李江降邑人成忠郎

趙時暉死之十二月知府事陳譚立義塚於覆舟

山

嘉熙元年四月詔兩淮策應軍戰宣化兩軍殺傷相

當陣亡將校李仙王海李左廖雷等贈官有差建

康旱境內流民劉俊等爲亂蒙古復寇六合縣尉

程克已及其妻王氏子附鳳俱死之贈克已承奉

郎附鳳淮西運幹

二年十月淮東總領吳潛言建康杜貞沙有流民十

餘萬宗子趙時暉團結十七寨其強壯二萬可籍

爲兵六合郭墅塌塘王峽塔等處又有強壯五千

人頭目王瞻義見行劄立硬寨遙與時暉相爲表

裏宜補時暉官又沙上蘆場并熟田係長蘆寺及

故將張俊產可得二十餘萬畝賣之以贍流民以

佐砦兵從之潛以沿江制司所調兵船在滁河口
菖蒲蕩等處屢爲蒙古所劫遂分兵時暇選精銳
過江攻之

淳祐三年知府事杜杲增府學養士田置貢士莊
五年密劄下建康招軍以策勝爲名分爲六軍其右
軍中軍屯駐府境

六年知府事趙以夫更府學命教堂曰明德堂六月
江淮飛蝗蔽空集食禾豆

七年四月以趙葵爲樞密使督視江淮京湖軍馬兼
知建康行宮留守江東安撫使凡軍中調度並聽
便宜行事

十二年五月詔申儆江防每歲以葺戰艦練舟師勤
惰爲殿最賞罰

寶祐二年三月蠲江淮今年稅

四年置御前遊擊軍創營屋三千餘間於武定橋東
五年減溧陽溧水酒息額錢蠲積負除上元江寧欺
隱稅額重建府治創安樂廬

六年知府事趙與憲奏分建康以下江爲三隘每隘

邏卒百人船十隻往來循視聯絡聲勢從之

開慶元年二月蠲建康沙田租三月知府事馬光祖奏蒙古兵自烏江還北四月詔賜夏貴溧陽田三十頃十月以趙葵爲沿江江東宣撫使置司建康任責捍禦創遊擊新軍寨屋置都統制

景定元年十一月倚閣句容溧陽溧水苗稅

二年六月倚閣上元句容溧水苗稅

三年經畧溧水民田

四年蠲上元江寧溧水苗稅經畧上元江寧民田溧陽饑知府事姚希得賑之荆寧江軍自建康太平至池州列砦置屋二萬餘間屯戍七千餘人

五年知府事馬光祖創先鋒馬寨造屯田倉

度宗皇帝咸淳元年初建郭門又創靜菴于清溪上及平糴倉助糴庫

二年創制司倉於廣儲倉左五月大雨水遣濟饑民三年重建貢院於清溪南

四年三月建康疫放免夏稅市利錢十二月詔建南軒書院于古長千里祠張栻

六年江南大旱

七年江南饑

九年四月以錢六十萬給沿江制置趙潛江防捍禦

十二月免沿江夏秋旱澇屯田租

十年正月推賞權總制施忠部將熊伯明知泰州龔

集橫山等處戰功詔減江東沙圩租米什之四十

一月元兵南侵乃命制置使趙潛巡江給錢百萬

十二月部下有逃歸謀亂者潛悉誅之命建康賑

避兵淮民

帝慈德祐元年正月趙潛置司於龍灣賈似道舟師

過建康以潛為督府參謀軍事二月師潰于丁家

洲趙潛棄城遁都統翁福降三月徐旺榮迎伯顏

入城句容溧水溧陽以次降知句容葛秉自殺詔

趙淮為太府寺丞戊銀樹東霸淮起兵溧陽與旺

榮戰敗績四月總制霍祖勝攻復溧陽詔以溧陽

民兵助戰功特免今年田租十月元兵發建康阿

刺罕由西道趨溧水溧陽率高興破東埧至護牙

山慶豐圩殺六將并士卒九千餘人十一月銅關

將貝寶胡岩起攻溧水死之贈寶武翼郎岩起朝
奉郎江東饑疫六合陷元立行省于建康以伯顏
爲平章事統上元江寧句容溧水

二年正月元徐旺榮復陷溧陽趙淮及二妾俱死之
元以溧陽隸建康六合隸揚州大都督府三月元
伯顏自臨安北還使阿答海張惠阿刺海董文海
遷三官期會于瓜步右丞相文天祥亡入真州與
其守苗再成議興復再成曰先約淮西兵趨建康
彼必悉力以扞吾西兵指揮淮東諸將以通泰兵

攻灣頭以高郵寶應淮安兵攻揚子橋以揚兵攻
瓜步吾以舟師直擣鎮江同日大舉灣頭揚子橋
皆沿江脆兵且日夜望我師之至攻之即下今三
面合攻瓜步吾自江中薄之雖有智者不能爲之
謀矣瓜步既舉以淮東兵入京口淮西兵入金陵
要其歸路浙帥可坐致也天祥大稱善即以書遺
制置使李庭芝遣使四出結約爲庭芝所疑不果
端宗皇帝景炎二年元罷建康宣撫司設江東建康
道提刑按察司江東道宣慰司皆治建康改建康

府為路知府事為總管溧陽縣為溧州設錄事司
江寧上元句容溧水皆領於路以張弘範為宣慰
使阿八赤為按察使

三年元改溧州為溧陽府罷茶運司及管田司以其
事隸宣慰改州為府元史無但金陵志出元人豈
置府止一年而史略之歟

帝昺祥興二年元改溧陽府為路領溧陽縣并錄事
司

元世祖皇帝至元十七年六月頒行鈔法於江淮廢
宋銅錢七月割建康民二萬戶種稻歲輸釀米三
萬石官為運至京師設織染局二

十八年立淘金總管府于建康撥溧水句容民戶五
千充淘金戶官吏苛取其甚為民害閏七月括江南
戶口稅課

十九年六合水十二月以建康淘金總管府隸建康
路

二十年五月蠲江南今年田賦十之二其十八年以
前逋負盡免之

二十一年正月立江淮行樞密院治建康以六合屬
真州置溧陽州織染局

二十二年以丞相阿答海同知樞密院事提調江淮
等處軍馬詔江淮民鬻子者官為贖之仍免醋課
弛魚禁二月設建康翼達魯花赤萬戶隸行院

二十三年二月詔江南學田隸官者復給本學養士
四月移行御史臺治建康五月江東按察司自建
康移宣州設句容生帛局并建康等處哈刺赤戶
計長官于溧水

二十四年閏二月設江南儒學提舉司罷建康淘金
總管府設提舉司仍增金課其江南竹木等課尋
罷

二十五年二月均江南站戶命有司料民戶稅至七
十石者當馬一匹並免雜徭十月令集賢院鈎考
江南學田置財賦提舉司于建康

一十六年二月詔籍江南戶口凡北方諸色人寓居
者亦籍之五月行御史臺自建康再移揚州禁江
南民挾弓矢籍以為兵

二十七年十一月江淮行省言建康等城跨據大江
人民繁會請置七萬戶府從之江南大水發粟以
賑流民

二十八年正月免江淮貧民逋租罷淘金提舉司三
月溧陽路饑賑之五月改按察司曰肅政廉訪司
省溧陽路爲縣復隸建康

按罷溧陽路元史在二
十七年及攷本紀賑五路饑以溧陽先太平徽州
廣德鎮江是路尚未罷也其餘前後多相戾者以
金陵志爲正後倣此

二十九年三月行御史臺復移建康移樞密院治鎮
江肅政廉訪司治寧國詔江南學田歲入聽其自
掌貢士莊田令覈數入官

三十年行樞密院調軍二千餘名於龍灣教習

金陵

志年表載於是年而歷代職官下又以爲明年事

三十一年六月免江淮今年夏稅之半

成宗皇帝元貞元年五月陞溧水溧陽二縣爲中州
仍隸建康路建康水七月詔江南地輸鈔
二年六月建康蝗發粟賑之

大德元年移益都新軍萬戶府鎮建康

二年正月建康溧陽水賑之仍弛澤梁之禁二月罷建康金銀銅冶轉運司還淘金戶於元籍歲辦金悉責有司

三年正月免江南夏稅十之三置惠民局擇良醫主之二月罷江東宣慰司建康直隸江浙等處中書行省溧陽大旱七月放江南僧寺佃戶爲編民

四年八月建康儒學災十二月賑建康饑民

五年七月暴風起東北江溢六合民被災發米以賑

十一月開後湖河道

六年七月建康民饑以米二萬石賑之

七年二月罷江南財賦總管府及提舉司時溧陽連年水旱

九年二月蠲江淮租稅十之二

十一年建康大饑總管岳天禎勸賑詔免酒醋課

武宗皇帝至大元年建康民饑疫死者相枕于道給米賑之七月詔免本路夏稅十月又免酒課十之

三

二年正月詔蠲江淮被災之家今年夏稅及至大二年以前逋負六月江寧上元溧水句容蝗十一月復設建康等處財賦提舉司於溧陽

仁宗皇帝延祐元年八月建康大水發廩減價賑糶十一月詔檢覈江東田稅

二年正月勅以江南行臺贓罰鈔賑濟饑民十一月免江淮夏稅十之三

七年四月增淮南江東田賦斗二升

英宗皇帝至治元年起廣運倉於龍灣山前受建康

并江西湖廣財賦就倉裝運下海

二年復罷建康等處財賦提舉司十一月詔免江淮今年包銀及官田租十之二

三年七月免江淮增科糧

泰定皇帝泰定元年六月六合旱江東水傷田

二年正月命懷王圖帖睦爾出居建康蔣山太平興國寺災閏月除江淮朔科包銀

三年建康路饑賑之溧陽六合大水

四年三月遣使往江南求奇異四月建康屬縣并六

合饑賑糧鈔有差

致和元年二月圖帖睦爾復自建康徙江陵

文宗皇帝圖帖睦爾天曆二年

八月令臺臣監造龍翔集慶寺南

臺御史言上龍潛建業居民困於供給幸而獲覩今日莫不跂望非常之恩今奪民時毀民居以創佛寺臺臣表正百官委以監造豈其禮哉昔漢高祖復豐沛兩縣光武免南陽稅三年今不務此而隆重佛教何以慰斯民之望佛教慈悲方便今尊佛氏而害生民無乃違其教乎乃免惟給鈔萬錠

爲寺置永業以江淮財賦都總管府隸宣政院供皇后湯沐設集慶萬壽營繕都司改建康路爲集慶路是年旱饑勸率富民賑糧一月

至順元年二月命市故瀛國公趙鼎田爲大龍翔集

慶寺永業三月集慶路饑五月免江淮夏稅十之

三七月江南水十二月詔龍翔集慶寺工役佛事

江南行臺悉給之復設江淮提舉司隸昭功萬戶

府

四年五月句容大水五棊山崩六月以江淮饑減今

年夏稅秋江寧不雨

順帝元統二年三月官兵獲劇盜曹福四等於秦淮并賊屬船隻噐仗贓物餘黨散走秋江寧旱革萬壽營繕都司

至元元年六月罷集慶財賦提舉司以其事歸有司二年四月以集慶廬州饒州禿禿哈民戶賜伯顏仍於句容設長官所領之溧陽大水

三年三月發義倉糧賑溧陽饑民六萬九千二百人溧水知州李衡言站戶消乏於溧陽僉補從之

四年浚臺治後溝故道東接清溪西通柵寨至清涼寺下會秦淮河

五年設常平倉於舊廣儲倉所上元挑浚龍光河自笑子橋經石頭城下至馬鞍山

六年三月詔賜江南行臺御史中丞史惟良上尊束帛

至正元年詔立曹南王阿剌罕祠於集慶仍賜官田一十頃是後揚子江一夕忽竭舟楫皆閣于塗中露錢貨無數蓋累年覆舟遺物也人爭取之潮至

輒走潮退復然累日江始安流識者曰此江笑也
後果先失江南

二年監察御史許儒扞建言重建卞忠貞公祠三月
總管府治火

三年十二月浚後湖并陰山河道後湖上至鍾山鄉
珍珠橋下接金陵龍灣大江通一十七里陰山則
上至官庄鋪下至毛公渡中分新舊兩河

七年九月集慶盜起鎮南王孛羅不花討平之十二
月沿江盜起有司莫能禁兩淮運使宋文瓚言戍

將非人致賊艦往來無常集慶花山賊才三十六
人官軍萬數不能進討反爲所敗後竟假手鹽徒
雖能成功豈不貽笑遠近宜亟選智勇以圖後功
不然則東南財賦恐非國家有不聽

八年二月以星吉爲江南行臺御史大夫

九年七月大霖雨江溢漂沒民居禾稼

十二年二月江淮盜起以御史大夫納麟爲江南行
臺御史大夫仍太尉設僚屬總制江浙江西湖廣
三省軍馬至則修築城郭已而賊陷溧水溧陽蔓

輒走潮退復然累日江始安流識者曰此江笑也
後果先失江南

二年監察御史許儒扞建言重建卞忠貞公祠三月
總管府治火

三年十二月浚後湖并陰山河道後湖上至鍾山鄉
珍珠橋下接金陵龍灣大江通一十七里陰山則
上至官庄鋪下至毛公渡中分新舊兩河

七年九月集慶盜起鎮南王孛羅不花討平之十二
月沿江盜起有司莫能禁兩淮運使宋文瓚言成
將非人致賊艦往來無常集慶花山賊才三十六
人官軍萬數不能進討反爲所敗後竟假手塩徒
雖能成功豈不貽笑遠近宜亟選智勇以圖後功
不然則東南財賦恐非國家有不聽

八年二月以星吉爲江南行臺御史大夫

九年七月大霖雨江溢漂沒民居禾稼

十二年二月江淮盜起以御史大夫納麟爲江南行
臺御史大夫仍太尉設僚屬總制江浙江西湖廣
三省軍馬至則修築城郭已而賊陷溧水溧陽蔓

延句容略上元江寧游兵至鍾山集慶甚危納麟
乃治兵部署士卒命治書侍御史左答納失理守
城中中丞伯家奴戍東郊是時湖廣行省平章政
事也先帖木兒軍和州納麟遣使求援復促其行
也先帖木兒引步騎度采石至臺城入候納麟納
麟喜即以其故聞于朝已而也先帖木兒兵東趨
秣陵殺賊二千餘人平湖熟鎮盡復上元江寧境
乘勝入溧陽溧水賊潰奔廣德其據龍潭方山者
奔常州閏三月詔納麟以便宜行事

十三年秋六合旱違魯花赤伯士寧禱之雨時兵亂
徐泗獨縣境肅然明年乃遭兵燹